

四庫全書

集部

欽定四庫全書

石倉歷代詩選卷一百八

明 曹學佺 編

方外五

釋貫休

字德隱  
鍾陵人

古意六首

一雨火雲盡閉門  
心冥冥蘭花與芙蓉  
滿院同芳馨  
佳人天一涯  
好鳥鳴嚶嚶  
我有雙白璧  
不羨趙虞卿  
我有

徑寸珠別是天地精玩之室生白蕭灑身安輕只應天上人見我雙眼明

陽鳥爍萬物草木懷春恩茫茫塵土飛培擁名利根我本事簑笠幼知天子尊學為毛氏詩亦多致直言不慕蠕蠕類附勢同崩奔惟尋桃李蹊去遊長者門

美人如游龍被服金鴛鴦手把古刀尺在彼白玉堂文章深掣曳珂珮鳴玎璫好風吹桃花片片落銀牀何當舉羽翰遠逐朱鳥翔

乾坤有清氣散入詩人脾聖賢遺清風不在惡木枝干  
人萬人中一人兩人知憶在東溪日花開葉落時幾擬  
以黃金鑄作鍾子期

古交如真金百鍊色不回今交如瀑流倏忽生塵埃我  
恐君子氣散為松柏栽我恐荆棘花只為小人開傷心  
復傷心吟上高高臺

莫輕白雲白不與風雨會莫見守羊兒謂是初平輩人  
生非日月光輝豈長在一榮與一辱今古常相對不見

于公門子孫好冠蓋

憶在山中時

憶在山中時丹桂花歲蕤紅泉浸瑤草日夕生華滋  
箬屋開地爐翠牆挂藤衣看經竹窻邊白猿三四枝  
東峰有老人眼碧頭骨奇種薤煮白石旨趣如嬰兒  
月上來打門月落方始歸授我微妙訣恬然無所為  
別來六七年只恐白日飛

行路難

君不見山高海深人不測  
古今來轉青碧淺近輕浮  
莫與交地卑只解生荆棘  
誰道黃金如糞土張耳陳餘  
斷消息行路難行路難君自看

詠吟

經天緯地物動必計天才盡  
日覓不得有時還自來  
真風含素髮秋色入靈臺  
吟向霜蟾下終須神鬼哀

春山行

重疊太古色濛濛  
花雨時好山行恐盡流水語  
相隨黑

壤生紅朮黃猿領白兒因君石橋日曾與道人期

送人赴舉

兩河兵火後西笑見吾曹  
海靜三山出天空一鶴高  
賃居槐陟屋行卷雪沾袍  
他日如相見栽松作小濤

老僧

獨住無人處松龕歡色侵  
僧中九十臘雲外一生心  
白髮垂不剃青眸笑轉深  
猶能指孤月為我暫開襟

贈道士

關茸復埃塵難親復易親皆疑有仙術問著却愁人祇  
恐耽浮蟻曾云見泣麟相逢先合掌渾似有前因

苦熱

松桂晝不動陽鳥飛半天稻麻雖結實砂石欲生煙毒  
氣仍于扇高枝不立蟬舊山多貯雪歸去是何年

贈隱者

千峰映碧湘真隱此中藏飯不煮石爛着應似雪長楓  
根支酒甕鶴虱落琴牀雖效忘機者斯人尚未忘



新蟬

尋常看不見花樹盡莓苔忽向高枝發驚從何處來風  
清聲更苦露潔思彌哀多少求名者年年被爾催

秋寄李頻使君

務簡趣誰陪清吟共綠苔葉和秋蟻落僧帶野風來留  
客朝嘗酒憂民夜畫灰終期冒風雪江上見宗雷

題簡禪師院

忘機室入空靜與沃洲同惟有半庭竹能生竟日風思

山海月上出定印香終繼後傳衣者還須立雪中

懷智體道人

把筆懷吾友庭鶯日轉時惟應一處住方得不相思雪  
水淹門聞春雷折樹枝平生無限事不獨白雲知

湘江懷古

煙浪漾秋色高吟孰得隣一輪湘渚月萬古獨醒人岼  
濕穿花遠雲香禱廟頻祗應諛佞者到此不傷神

寒思廬山賈生

山兄詩僻甚寒夜更何為覓句惟頑坐嚴霜打不知石  
膏粘木屐崖栗落冰池近見禪僧說生涯勝往時

雪夜寄友人

皓彩中宵合開門失所蹤何年今夜意共子在孤峰氣  
射燈花落光侵壁罅濃惟君心似我吟到五更鐘

途中逢周朴

東西南北路相遇共興衰世獨無知己君從何處來菊  
衰芳草在程遠宿煙開儻遇求賢主登庸不用媒

休糧僧

不食更何求自由中自由身輕嫌衲重天旱為民愁應  
器誰將去生臺蟻不遊會須傳此術共老在林丘

題擇詞律師院

律中麟角者高淡出塵埃芳草不曾觸幾生如此來  
風吹磬斷杉露滴花開如結林中社伊予願一陪

哭靈一上人

一公何不在空有遠公名共說岑山路今時不可行  
舊

房松更老新塔草初生  
經論傳緇侶文章徧墨卿  
禪林枝幹折法宇棟梁傾  
誰後修僧史應知傳已成

送崔峒使往睦州兼寄薛司戶

如今相府用英髦  
獨往南州肯告勞  
冰水近開漁浦出  
雪雲初卷定山高  
木奴花映桐廬縣  
青雀舟隨白鷺濤  
使者須應訪廉吏  
府中惟有范功曹

九日登高

詩人九日憐芳菊  
逐客高齋瞰浙江  
漁浦浪花搖素壁

西陵樹色入秋窻木奴向熟懸金實桑落新開瀉玉缸  
四子醉時爭講德笑論黃霸屈為邦

謝諸公宿鏡水宅

幸免低頭向府中貴將藜藿與君同陽雁叫霜來枕上  
寒山映月在湖中詩書何德名夫子草木推年長數公  
聞道漢家偏好少此身那比訪芝翁

題茅山李尊師所居

天師百歲少如童不到山中更不逢洗藥每臨新瀑水

步虛時繞最高峰  
籬根五月留殘雪  
座右千年蔭古松  
此去人寰知近遠  
迴看路隔一重重

獻錢尚父

貴逼人來不自由  
龍驤鳳翥勢難收  
滿空花醉三千客  
一劍霜寒十四州  
鼓角揭天嘉氣冷  
風濤動地海山秋  
東南永作金天柱  
誰羨當時萬戶侯

山中

休話喧譁事事難  
山翁只合住深山  
數聲清磬是非外

一箇閒人天地間  
綠圃空階雲冉冉  
異禽靈草水潺潺  
無人爲向羣儒道  
岩桂枝高更好攀

其二

誰是言休即便休  
高吟靜坐碧峰頭  
三間茅屋無人到  
十里松門獨自遊  
明月清風宗炳社  
夕陽秋色庾公樓  
修身未到無心地  
萬種千般逐水流

其三

露滴紅蘭玉  
繞畦閒拖象屐到峰西  
但令心似蓮花潔



何必身將槁木齊古塹細煙紅樹老半巖殘雪白猿啼  
雖然不是桃源洞春至桃花亦滿溪

其四

嵐嫩風輕似碧紗雲樓金像滿煙霞葛苞玉粉生香瓏  
菌簇銀丁出古槎舉世只知嗟逝水無人微解悟空花  
可憐擾擾塵埃裏雙鬢如絲事若麻

其五

心心心不住希夷石室巉巖白髮垂惜竹不除當路笋

愛松留得礙人枝  
焚香開卷霞生砌  
捲箔冥心月在池  
無限故人頭已白  
不知今日復何之

其六

孤庵暝月在穹冥  
茵枕松牀蘚陣青  
乳鹿暗行樵徑雪  
瀑泉微濺石樓經  
閒吟不覺過天井  
長嘯還能動嶽靈  
應恐無人知此意  
非凡非聖獨惺惺

其七

五嶽煙霞連不斷  
三山洞穴去應通  
石窻歌枕疎疎雨

水碓無人浩浩風童子念經深竹裏獼猴捫虱夕陽中  
因嗟往事拋心力六七年來楚水東

其八

翠竇煙岩畫不成桂華瀑沫雜芳馨撥霞掃雪和雲母  
掘石移松得茯苓好鳥似花窺玉磬嫩苔如水沒金餅  
從他人哭從他笑地覆天翻也只寧

其九

自休自了自安排常願居山事偶諧僧採樹皮臨絕壑

猿爭山果落空階閒擔茶器緣青嶂靜補禪袍坐綠崖  
虛作新詩反招隱出來多與此心乖

月夕

霜月夜徘徊樓中羌笛催曉風吹不盡江上落殘梅

春野

閒步淺青平綠流水征車自速誰家挾彈少年擬打紅  
衣啄木

秋夜曲

蟋蟀切切風騷騷芙蓉歆香蟾蜍高孤燈耿耿征婦勞  
更深撲落金錯刀

春晚

深門寂寂黍飯馨山家煙火春雨晴庭花濛濛水泠泠  
小兒啼索樹上鶯

深山逢老僧

衲衣線粗心似月自把短鉏同楫桡青石溪邊踏葉行  
數片雲隨兩耆雪

邊上作二首

山無綠兮水無清風既毒兮沙亦腥胡兒走馬疾飛鳥  
聯翩射落雲中聲

其二

陣雲忽向沙中起探得胡兵過遼水堪嗟護塞征戍兒  
未戰已疑身是鬼

宿深村

行行一宿深村裏雞犬豐年鬧如市黃昏見客合家喜

月下取魚肩塘水

書石壁禪居

赤旃檀塔六七級白齒苔花三四枝  
禪客相逢勸歸去此心能有幾人知

聽僧彈琴

家住吳王古戰城海風終日打檣聲  
今朝鄉思渾堆積琴上聞師大蟹行

題蘭江言上人院二首

一生只著一麻衣  
道業還期習彥威  
手把新詩說山夢  
石橋天柱雪霏霏

只是危吟坐翠層  
門前岐路自崩騰  
青雲名士時相訪  
茶煮西峰瀑布冰



石倉歷代詩選卷一百八

欽定四庫全書

石倉歷代詩選卷一百九

明 曹學佺 編

方外六

釋齊己

廬岳人有  
白蓮集

荆渚疾中因思匡廬遂寄梁先輩

老生病死者早聞天竺書相隨幾汨沒不得堪歎歎自  
理自可適他人誰與祛應當入寂滅乃得長銷除前月

已骨立今朝還貌舒披衣試步履倚策聊躊躇江月青  
眸冷秋風白髮疎新題憶剡硯舊約懷匡廬張野人絕  
跡樂天曾卜居空龕掩薜荔瀑布歎蟾蜍古檜鳴玄鶴  
涼泉躍錦魚狂吟樹陰映縱踏花薦菸屑舌既已閒心  
脾亦散擺松窻有偃息石逕無趑趄夢冷通仙闕神融  
合太虛千峰杳靄際萬壑明清初長往期非晚半生閒  
有餘依劉耒是詠訪戴寧忘諸稽古堪求已觀時好笑  
渠埋頭逐小利沒脚拖長裾道種將閒養情田把藥鉏

幽香發蘭蕙穢莽摧丘墟敢謂囊盈物那言廣滿儲微  
煙動晨爨細雨滋園蔬鮮亂珍禽羽門稀長者車冥機  
生兀兀著履行徐徐每許親朱履多憐奉隼旗簪嫌紅  
玳瑁社念金芙蓉海內競鐵馬篋中藏紙驢常言謝時  
去此意將何如

瀟湘二十韻

二水遠難論從離向坎奔冷穿千嶂脈清過幾州門闊  
出都凝白傍來盡帶渾經遊聞舜禹表裏見乾坤浦靜

魚閒釣灣涼雁自屯月來分夜底雲度見秋痕暮氣藏  
隣寺寒濤聒近村離騷傳永恨鼓瑟奏遺魂霧擁魚龍  
窟槎歌島嶼根秋風帆上下落日樹沈昏柳少砂洲缺  
苔多古岼存禽巢依橘柚獺逕入蘭蓀色自江南絕名  
聞海內尊吳顏雄莫遏漢口壯堪吞寥泺晴方映馮夷  
信忽翻渡遙峰翠疊汀小荻花繁勢接湖煙漲聲和嶂  
雨歎急搖吟客舫狂濺野人樽疏鑿誰窮本澄鮮自有  
源對茲傷九曲含濁出崑崙

竹裏作六韻

獨來深處坐，剝覺有吟思。  
忽似瀟湘岸，欲生風雨時。  
冷煙生古屋，乾籜墮秋墀。  
徑熟因頻入，身閒得徧歌。  
踏多鞭節損，題亂粉痕隳。  
猶見前山疊，微茫隔短籬。

題鶴鳴泉八韻

嘹唳遺蹤去，澄明物掩難。  
噴開山面碧，飛落寺門寒。  
汲引隨瓶滿，分流逐處安。  
幽蟲乘葉過，渴狄擁條看。  
上有危峰疊，旁宜恠石盤。  
冷吞雙樹影，甘潤百毛端。  
異早聞

鑄玉靈終別建壇瀟湘在何處終日自波瀾

風琴引

按吳絲雕楚竹高託天風拂為曲一一宮商在素空鸞  
鳴鳳語翹梧桐夜深天碧松風多孤窻寒夢驚流波愁  
魂傍枕不肯去翻疑住處隣湘娥金風聲盡薰風發冷  
汎虛堂韻難歇常恐聽多耳漸繁清音不絕知音絕

湘妃廟

湘煙濛濛湘水急汀露凝紅裛蓮濕蒼梧雲疊九疑深

二女魂飛江上立江上立相攜泣鳳蓋龍輿追不及廟  
荒松朽啼飛猩笋鞭迸出階基傾黃昏一片陰風起新  
月如睂生闊水

和鄭谷郎中幽棲之什

誰知閒退跡門逕入寒汀靜倚雲僧杖孤看野燒星墨  
霑吟石黑苔染釣船青相對惟溪寺初宵聞念經

勉詩僧

莫把毛生刺低徊謁李膺須防知佛者解笑愛名僧道



性宜如水詩情合似水還同蓮社客聯唱遶香燈

送人遊湘湖

君遊南國去旅夢若為寧一路隨鴻雁千峰遶洞庭林  
疎風盡落野黑燒初經有興尋僧否湘西寺最靈

東林雨後望香爐峰

翠濕僧窻裏寒生鳥道邊靜思尋去路危遶落來泉暮  
雨開青壁朝陽照紫煙二林多長老誰憶上頭禪

苦熱中江上懷爐峰舊居

舊寄爐峰下杉松遶石房  
年年五六月江上憶清涼  
久別應荒廢終歸隔渺茫  
何當便搖落披衲玩秋光

荆門送晝公歸彭澤舊居

彭澤禪居在匡廬翠疊前  
因思從楚事便附入吳船  
岼遶春殘樹江浮霽後天  
應過虎溪社佇立想諸賢

寄懷江西栖公

龍沙為別日廬阜得書年  
不見來香社相思遶白蓮  
江僧歸海寺楚路接吳煙  
老病何堪說扶羸寄此篇

送趙長史歸閩川

荆門與閩越關戍隔三千風雪揚帆去臺隍指海邊客  
情銷古冶王化似堯年莫失春迴約江城穀雨前

送休上人歸永嘉舊居

東越常懸思山門在永嘉秋光浮楚水帆影背長沙城  
黑天台雨村明海嶠霞時尋謝公迹春草自瑤花

憶在匡廬日

憶在匡廬日秋風八月時松聲虎溪寺塔影雁門碑步

碧歲黪逕吟香菡萏池何當舊泉石歸去洗心脾

貽廬岳陳沆秀才

為儒老雙鬢勤苦竟何如四海方磨劍空山自讀書石  
圍泉眼碧秋落洞門虛莫慮搜賢僻徵君舊此居

書匡山隱者壁

紅霞青壁底石筍薜蘿垂應有迷仙者曾逢採藥時桃  
花饒兩頰松葉桂長髭直是來城市何人識得伊

懷天台華頂僧

華頂危臨海丹霞裏石橋曾從國清寺上看月明潮好  
鳥親香火狂泉噴沍寥欲歸師智者頭白路迢迢

寄東林言之禪子

閒思相送後幽院閉苔錢使我吟還廢聞君病未痊聽  
秋惟困坐怕客但佯眠可惜東窻月無寥過一年

聽泉

落石幾萬仞遠聲飄冷空高秋初雨後半夜落山中只  
有照壁月更無吹葉風幾曾廬岳聽到曉與僧同

匡山寓居栖公

外物盡已悟閒行亦自由  
好山逢過夏無事住經秋  
樹影殘陽寺茶香古石樓  
何時定休講歸漱虎溪流

送朱秀才歸閩

荆門來幾日欲往又囊空  
遠客歸南越單車背北風  
近鄉微有雪到海漸無鴻  
努力成詩業無諸謁至公

書古寺僧房

綠樹深深洞長明  
焰焰燈春時遊寺客  
花落閉門僧萬

法心中寂孤泉石上澄勞生漫問處喧默不相應

湖西逸人

老隱洞庭西漁樵共一溪琴前孤鶴影石上遠僧題橘  
柚園林熟薰葭逕路迷君能許隣並分藥斲春畦

登金山寺

四面白波聲中流翠嶠橫望來堪目斷上徹始心平鳥  
向天涯出雲連水國生重來與誰約題罷自吟行

又

山帶名金遠樓臺壓翠層魚龍光照象風浪影搖燈檻  
外揚州樹船中建業僧塵埃何所到青石坐如冰

寄楚萍上人

北面香爐秀南邊瀑布寒自來還獨去夏滿復秋殘日  
影杉松亂雲容洞壑寬何峰是隣側片石許相安

寄上荆渚因夢廬岳乃圖壁賦時遂日向漸

夢繞嵯峨裏神疎骨亦寒覺來誰共語壁上自圖看古  
翠松歲寺春紅杏濕壇歸心幾時遂日向漸衰殘



送東林寺睦公往吳國

八月江行好風帆  
日夜飄煙霞經北固  
禾黍過南朝社  
客無宗炳詩家有鮑  
昭莫因賢相名不返  
舊山椒

嘗茶

石屋晚煙生松窻鐵  
碾聲因留來客試共  
說寄僧名味  
擊詩魔亂香搜睡思  
輕春風雪川上憶傍  
綠叢行

居道林寺書懷

花落水喧喧端居信  
晝昏誰來看山寺自  
要掃松門是

事皆能諱惟詩未懶言傳聞好時世亦欲背啼猿

謝興公上人寄山水簇子

半幅古孱顏看來心意閒何須尋鳥道即此出人間  
巖暮疑啼狖松深認掩關知君遠相惠免我憶歸山

登大林寺觀白太傅題版

九疊蒼崖裏禪家鑿翠開清時誰夢到白傅獨尋來  
怪石和僧定閒雲共鶴迴任茲休去者心是不然灰

別東林後迴寄修睦

昨夜從香社辭君出薜蘿晚來巾舄上已覺俗塵多遠  
路縈芳草遙空共白波南朝在天末此去重經過

秋苔

獨憐蒼翠文長與寂寥存鶴靜窺秋片僧閒踏冷痕月  
明疎竹逕雨歇敗莎根別有深宮裏蕪花鎖斷魂

夏日栖霞寺書懷寄張逸人

人中林下現名自有閒忙建業紅塵滿栖霞白石涼倚  
身輕几穩灑面瀑流香不似高齋裏花連竹影長

題東林白蓮

大士生兜率空池滿白蓮  
秋風明月下霽日影堂前  
色混羣芳坼香殊百和然  
誰知無染性一片好心田

東林竹寄金陵知己

十八真賢像時來拂蘚看  
已知前事遠更結後人難  
泉滴勝清磬松香掩白檀  
憑君聽朝貴誰欲厭簪冠

贈浙西李推官

他皆恃勲貴君獨富詩篇  
終日秋光裏無人竹影邊  
東

樓坐待月北固積吟煙聞說駕行侶多才復少年

早梅

萬木凍欲折孤根暖獨回前村深雪裏昨夜一枝開風  
遞幽香出禽窺素艷來明年如應律先發望春臺

寄鏡湖方干處士

賀監舊山川空來近百年聞君與琴鶴終日在漁船島  
露深秋石湖澄半夜天雲門幾迴去題偏好林泉

送人遊塞

槐柳野橋邊行塵暗馬前秋風來漢地客淚入胡天雁  
聚河流濁羊羣磧草羶那堪隴頭宿鄉夢逐潺湲

新秋雨後

夜雨洗河漢詩懷覺有靈籬聲新蟋蟀草影老蜻蜓靜  
引閒機發涼吹遠思醒逍遙向誰說時泥漆園經

贈曹松先輩

今歲赴春闈達如夫子稀山中把卷去榜下注官歸楚  
月吟前落江禽酒外飛閒遊向僧寺仍著白麻衣

傷鄭谷郎中

鍾陵千首作筆絕亦身終知落干戈裏誰家煨燼中吟  
齋春長蕨釣渚夜鳴鴻惆悵秋江月曾招我看同

題終南山隱者室

終南山北面直下是長安自掃青苔室閒歌白石看風  
吹窻樹老日曠竇雲乾時向圭峰宿僧房瀑布寒

原上晚望

倚杖聊攬望寒原遠近分夜來何處火燒出古人墳野

勢盤空澤江流合暮雲殘陽催百鳥各自著栖羣

過陳陶處士舊居

一室貯琴樽詩皆大雅言夜過秋竹寺醉打老僧門遠  
燒侵籬下寒蔬簇石根閒庭除鶴迹半是杖頭痕

春興

柳暖鶯多語花明草盡長風流在詩句牽率繞池塘叫  
切禽名宇飛狂蝶姓莊時來真可惜自勉綴蘭芳

題真州精舍



波心精舍好那岼是繁華礙目無高樹當門即遠沙晨  
齋趨海客夜磬到漁家石鼎秋濤靜禪回有嶽茶

秋夜聽業上人彈琴

萬物都寂寂堪聞彈正聲人心盡如此天下自和平湘  
水瀉秋碧古風吹太清往年廬嶽奏今夕更分明

聞落葉

楚樹霜晴後蕭蕭落晚風因思故國夜臨水幾株空煮  
茗燒乾脆行苔踏爛紅來年未離此還見碧成叢

遇廬嶽僧

一聞飛錫別區中  
深入西南瀑布峰  
天際雪埋千片石  
洞門冰圻幾株松  
煙霞明媚栖身地  
苔蘚縈紆出世蹤  
莫問江邊舊居寺  
火燒兵劫斷秋鐘

懷匡阜

荊州連歲滯遐方  
拄杖塵封六尺光  
洗面有香思石溜  
冥心無撓憶山牀  
閒機但媿時機速  
靜論須慙世論長  
昨夜分明夢歸去  
薜蘿幽逕遶禪房

送泰禪師歸南嶽

石龕閒鎖白猿邊  
歸去途程半在船  
林簇曉霜離水寺  
路穿新燒入山泉  
已尋嵐壁臨空盡  
却看星辰向地懸  
有興寄題紅葉上  
不妨收拾別為編

昭陽微公山房

曲江流影石千株  
吾子思歸夢斷初  
有信北來山疊疊  
無言南去雨疎疎  
祖師門接園林路  
丞相家同井邑居  
閒野老身留得否  
相招多是秀才書

早鶯

何處經年絕好音  
暖風催出轉喬林  
羽毛新刷陶潛菊  
喉舌初調叔夜琴  
歲雨並栖紅杏密  
避人雙入綠楊深  
曉來枝上千般語  
應共桃花說舊心

寄萍鄉唐稟正字

新書聲價滿皇都  
高卧林中更起無  
春興酒香薰肺腑  
夜吟雲氣濕髭鬚  
同登水閣僧皆別  
共上漁船鶴亦孤  
長憶前年送行處  
洞門殘日照菖蒲

送李秀才歸湘中

詞客攜文訪病夫，因吟送別憶湘湖。  
寒消浦溆催鴻雁，暖入溪山養鷓鴣。  
僧向月中尋嶽麓，雲從城上去蒼梧。  
君歸為問峰前寺，舊日松房鎖在無。

送人入蜀

何必閒吟蜀道難，知君心出嶮巖間。  
尋常秋汎江陵去，容易春浮錦水還。  
兩面碧懸神女峽，幾重青出丈人山。  
文君酒市逢初雪，滿貫新醅洗俗顏。

寄南嶽泰禪師

江頭默想坐禪峰  
白石山前萬丈空  
山下獵人應不到  
雪深花鹿在庵中

寄清溪道者

萬重千疊紅霞嶂  
夜燭朝香白石龕  
常記溪窻凭危檻  
看經影落古龍潭

貽九華上人

一法傳聞繼老能  
九華閒卧最高層  
秋鐘盡後殘陽暝

門掩松邊雨夜燈

送人往長沙

荆門歸路指湖南千里風帆興可諳  
好聽鷓鴣啼雨處木蘭舟晚泊春潭

夏日城中作

三面僧隣一面牆更無風路可吹涼  
他年捨此歸何處青壁紅霞裏石房

又

竹低沙淺雨濛濛  
小檻幽窻暑月中  
有境牽懷人不會  
東林門外翠橫空

水邊行

身著袈裟手杖藤  
水邊行止不妨僧  
禽栖日落猶孤想  
隔浪秋山千萬層

幽齋偶作

幽院纔容箇小庭  
疎簷低短不堪情  
春來猶賴隣僧樹  
時引流鶯送好聲



送僧歸日本

日東來向日西遊一鉢閒尋徧九州却意雞林本師寺  
欲歸還待海風秋

酬光上人

禪言難後到詩言坐石心同古鏡魂應記前秋會吟處  
五更猶立老松根

無本

尋隱者不遇

松下問童子言師採藥去只在此山中雲深不知處

寄友

聞說到楊州吹簫有舊遊人來多不見莫是上迷樓

石倉歷代詩選卷一百九

欽定四庫全書

石倉歷代詩選卷一百十

明 曹學佺 編

方外七

釋脩睦

秋日閒居

是事不相關誰人似此閒  
捲簾當白晝移榻對青山  
野鶴眠松上秋苔長雨間  
嶽僧頻有信昨日得書還

宿岳陽開元寺

竟夕憑虛檻何當興歎頻往來人自老今古月長新  
風逆漁沈唱松疎鶴露身無眠鐘又動幾客在迷津

東林寺

欲去不忍去徘徊吟繞廊水光秋澹蕩僧好語尋常  
碑古苔文疊山晴鐘韻長翻思南嶽上欠此白蓮香

寄貫休上人

淺語亦關詩常流安得知楚郊來未久吳地立多時  
玩

月無人近歸林有鶴隨所居渾不遠相識偶然遲

懷虛中上人

簷雨滴更殘思君安未安湘川聞不遠道路去尋難吟  
髭霜應蝕禪衣雪漸寒倚松因獨立一鳥下江干

無悶

暮春送人

折柳亭邊手重攜江煙澹澹草萋萋杜鵑不顧離人意  
更向落花枝上啼

寒林石屏

草堂無物件身閒惟有屏風枕簟間  
本向他山求得石仍于石上看他山

景雲

老僧

日照西山雪老僧門始開  
凍瓶粘柱礎宿火陷爐灰  
童子病歸去鹿麋寒入來  
齋鐘知漸遠枝鳥下生臺

谿叟

谿翁居處靜谿鳥入門飛早起釣魚去夜深乘月歸露  
香菰米熟煙暖荇絲肥瀟灑塵埃外扁舟一草衣

畫松

畫松一似真松樹且待尋思記得無曾在天台山上見  
石橋南畔第三株

法振

病愈寄友

哀樂暗成疾卧中方月移西山有清士孤嘯不可追搗



藥晝林靜汲泉陰澗遲微蹤與麋鹿遠謝求羊知

送常大夫赴朔方

關山今不掩軍候鳥先知大漢嫖姚入烏孫部曲隨高  
旌天外駐寒角月中吹歸到長安地花應再滿枝

送人遊越

不須行借問為爾話聞中海島春寒雨江帆日暮風道  
遊玄度宅身寄朗陵公此別何傷遠如今關塞通

張舍人南溪別業

新田繞屋半春畊  
藜杖閒門引客行  
山翠自成微雨色  
溪花不隱亂泉聲  
漁家遠到堪留興  
公府懸知亦厭名  
入夜更宜明月滿  
雙童呼出解吹笙

月夜泛舟

西塞長雲盡南湖  
片月斜漾舟人不  
見卧入武陵花

送友人之上都

玉帛徵賢楚客稀  
猿啼相送武陵歸  
潮頭望入桃花去  
一片春帆帶雨飛

栖白

送禪師宗極歸玉峰

背郭去歸宿頭陀意頗濃  
鶴爭栖遠樹猿鬪上孤峰  
夜成經霜月秋城過雨鐘  
由來無定止何處訪高蹤

尋山僧真勝上人不遇

松下禪栖所苔滋逕莫分  
青山春暮見流水夜深聞  
不坐看山石應隨出定雲  
猿獮非可問巖谷日空曛

邊思

西北黃雲暮聲聲畫角愁陰山一夜雨白草四郊秋亂  
岬鳴寒渡飛沙入廢樓何時番色盡此地見芳洲

送王鍊師歸嵩嶽

飄然綠毛節杳去洛城端隔水見秋嶽兼霜掃石壇一  
溪松色古半夜鶴聲寒迴與人寰別勞生不可觀

送石秀才

正是歎羈遊知音拜楚侯何須辭遠道自可樂扁舟倚  
棹江洲雨聞猿島岫秋謝家山水興終日待詩流

月夜懷劉秀才

獨夜相思但自勞  
阮生吟罷夢雲濤  
此時小定未禪寂  
古塔月中松磬高

經廢宮

終日河聲咽暮空  
煙愁此地晝濛濛  
錦帆東去沙侵苑  
玉輦西來樹滿宮  
魯客望津天欲雪  
朔鴻離岼葦生風  
那堪獨立思前事  
回首殘陽雉堞紅

贈識古法師

重城深寺講初休，却憶家山訪舊遊。  
對月與君相送夜，聞蛩教我獨驚秋。  
雲心杳杳難為別，鶴性蕭蕭不可留。  
遙想孤舟清渭上，飄然帆影起離愁。

隱巖

牧童

牧童見人俱不會，盡著芒鞋戴箬笠。  
朝陽未出衆山晴，露滴蓑衣猶半濕。  
二月三月時，平原草初綠。  
三箇五箇騎羸牛，前村後村來放牧。  
笛聲纔一舉，衆稚齊歌舞。  
看

看白日向西斜各自騎牛又歸去

蜀中送人遊廬山

君遊正值芳春月蜀道千山皆秀發溪邊十里五里花  
雲外三峰兩峰雪君上匡山我舊居松蘿拋擲十年餘  
君行試到山前問山鳥只今相憶無

琴

七條絲上寄深意澗水松風生十指自乃知音猶尚稀  
欲教更入何人耳

處默

題聖果寺

路自中峰上盤回出薜蘿到江吳地盡隔岼越山多古  
木叢青靄遙天浸白波下方城郭近鐘磬雜笙歌

遠煙

靄靄前山上凝光滿薜蘿高風吹不盡遠樹得偏多翠  
與晴雲合輕將淑氣和正堪流野目朱閣意如何

憶廬山舊居



粗衣糲食老煙霞免抱衰顏惜歲華獨鶴祇應山客伴  
閒雲常在野僧家叢生嫩蕨粘松粉自落乾薪帶蘚花  
明月清風舊相得十年歸恨可能賒

題栖霞寺僧房

名山不取買山錢任構花宮近碧巔松檜老依雲裏寺  
樓臺深鎖洞中天風經險嶂回疎雨石倚危屏挂落泉  
欲結茆庵體師住肯饒多少薜蘿煙

山中作

席簾高卷枕高欹門掩垂蘿蘸碧溪閒把史書眠一覺  
起來山日過松西

卿雲

長安言懷寄沈彬侍郎

故園黎嶺下歸路接天涯生作長安草勝為邊地花雁  
南飛不到書北寄來賒堪羨神仙客青雲早致家

送人遊塞

去去玉關路省君曾未行塞深多伏寇時靜亦屯兵雪

每先秋降花嘗近夏生閒陪射鵰將應到受降城

舊國里

舊居黎嶺下風景近炎方地暖生春早家貧覺歲長石  
房雲過濕杉徑雨餘香日夕竟無事詩書聊自強

曇域

宿鄭諫議山居

堂開星斗邊大諫採薇還禽隱石中樹月生池上山涼  
風吹詠思幽語隔禪關莫擬歸城計終妨此地閒

懷齊已

鬢髯秋景兩蒼蒼  
靜對茅齋一炷香  
病後身心俱澹泊  
老來朋友半凋傷  
峨嵋山色侵雲直  
巫峽灘聲入夜長  
猶喜深交有支遁  
時時音信到松房

雲表

寒食日

寒食悲看郭外春  
野田無處不傷神  
平原壘壘添新塚  
半是去年來哭人

子蘭

登樓憶友

物象遠濛濛周迴極望中帶煙千井樹和磬一樓風月  
色寒沈地波聲夜颺空登臨無限趣恨不與君同

華嚴寺望樊川

萬木葉初紅人家樹色中疎鐘搖雨脚秋水浸雲容雪  
磧回寒雁村燈促夜春舊山歸未得生計欲何從

與道侶同于水陸寺會宿

論道窮心少有朋此時清話昔年曾  
柿凋紅葉鋪寒井  
鵲墜霜毛著定僧風遞遠聲秋澗水竹穿深色夜房燈  
出門盡是勞生者只此長閒幾箇能

城上吟

古塚密于草新墳侵官道城外無閒地城中人又老

襄陽曲

為憶南遊人移家大堤住千帆萬帆來盡過門前去

蟬

獨蟬初唱古槐枝  
委曲悲涼斷續遲  
雨後忽聞誰最苦  
異鄉孤館憶家時

長安早秋

風舞槐花落御溝  
終南山色入城秋  
門門走馬徵兵急  
公子笙歌醉玉樓

懷楚

謝友人見訪留詩

軒車誰肯到泉石  
自相親暮雨凋殘寺  
秋風悵望人庭

新一片葉衣上十年塵賴有瑤華贈清吟愈病身

送新平故人

常聽倉庚思舊友又因蝴蝶夢生涯一千餘里河連郭  
三十六峰寒到家陰島宜分東鴈雁晴樓高入上陽鴉  
姜原廟北與君別應笑薄寒悲落花

惠標

賦山

靈山縕麗名秀出寫蓬瀛香爐帶煙上紫蓋入霞生霧



卷蓮花碧巖開石鏡明定知丘壑裏併佇白雲情

又

峨眉信重險天日本仙居金華抱丹竈玉笥蘊神書幽  
人被薜荔怨妾採藤蕪紫君無暮雨何時送故夫

詠水

曾添疎勒井經湧貳師營玉津花色亮銀溪錦磧明丹  
如空裏泛人似鏡中行持將符上善利物動高情

可朋

桐花鳥

五色毛衣比鳳雛，深花叢裏祗如無。  
美人買得偏憐惜，移向金釵重幾株。

懷浦

贈智舟三藏

壯歲心難伏，師心伏豈難。  
尋常獨在院，行坐不離壇。  
嶽雪當禪暝，松風入咒寒。  
更因文字外，多把史書看。

初冬旅舍蚤懷

枕上角聲微離情未息機夢回三楚寺寒入五更衣月  
沒棲禽動霜晴凍葉飛自慚行役早深與道相違

慕幽

酬友人見寄

家國各萬里同吟六七年可堪隨北雁迢遞向南天水  
共行人遠山將落日連春淮有雙鯉莫忘尺書傳

三峽聞猿

誰向茲來不恨生聲聲都是斷腸聲七千里外一家住

十二峰前獨自行  
瘴雨晚藏神女廟  
蠻煙寒鎖夜郎城  
憑君且莫哀吟好  
會待青雲道路平

善生

送智光之南值雨

結束衣囊了炎州  
定去遊草堂方惜別  
山雨為相留又得一宵  
話免生千里愁  
莫辭重卜日後會必經秋

旅中答喻軍事問客情

一自遊他國相逢少  
故人縱然為客樂  
爭似在家貧畜

恨霜侵鬢撥詩病入神若非憐片善誰肯問風塵

尚顏

懷智栖上人

臨水登山自有期不同遊子暮何之閒眠默坐身堪賞  
已去還來事可知林鳥隔雲飛一餉草蟲和雨叫多時  
思君最易令人老倚檻空吟所寄詩

峽中酬荆南鄭準

山齊西向蜀江濱四載安居復有羣風雁勢高猶可見

雪猿聲苦不堪聞  
新詩寫出難勝寶  
破衲行時却類雲  
每喜沂流賓客說  
元瑜刀筆潤雄軍

贈村公

紬衣木突此鄉尊  
白盡鬚眉眼未昏  
醉舞神筵隨鼓笛  
閒歌聖代和兒孫  
黍苗一頃垂秋日  
茅棟三間映古原  
也笑長安名利處  
紅塵半是馬蹄翻

宿巴江

江聲五千里瀉碧  
急于絃不覺日又  
夜爭教人少年一

汀巫峽月兩岼子規天山影似相伴依依到客船

遊邊

邊雲四顧濃飢馬嗅枯叢萬里八九月一身西北風偷  
營天正黑戰地雪多紅昨夜東歸夢桃花暖色中

居南嶽懷沈彬

石房開竹扉茗外獨支頤萬木還無葉百年能幾時隔  
雲聞狄過截雨見虹垂因憶嶽南客晏眠吟好詩

南中懷友生

荔枝江下立望北幾思量隔海無書劄前年在漢陽瘴  
村人起早銅柱象揩光居此成何事尋君過碧湘

理瑩

送戴三徵君還谷口舊居

巖穴多遺秀公車屢遠招周王尊渭叟潁客傲唐堯出  
處天波洽闕河地勢遙瞻星吳郡夜作霧華山朝清論  
虛重席閒居掛一瓢漁歌思坐酌宸渥寵行軺春為荷  
裳煖霜因葛履消層崖懸瀑溜萬壑振清飈谷鳥還遷



木場駒正食苗謝安何日起台鼎佇君調

玄寶

路

南北東西去茫茫萬古塵關河無盡處風雪有行人險  
極山通蜀平多地入秦營營名利者來往豈辭頻

庾樓

郡樓名甚遠幾換見樓人庾亮魂應在清風到白蘋晴  
軒分楚漢夜酒揖星辰何必匡山上獨言無世塵

寄華山司空圖

門徑放莎長往來投刺稀  
有時開御札特地掛朝衣  
嶽信僧傳去仙香鶴帶歸  
他年二南化無復更衰微

石倉歷代詩選卷一百十

欽定四庫全書

石倉歷代詩選卷一百十一

明 曹學佺 編

宗風

三祖鑑智禪師信心銘

至道無難惟嫌揀擇但莫憎愛洞然明白毫釐有差天  
地懸隔欲得現前莫存順逆違順相爭莫為心病不識  
玄旨徒勞念靜圓同太虛無欠無餘良由取舍所以不

如莫逐有緣勿住空忍一種平懷泯然自盡

又

心動歸止止更彌動惟滯兩邊寧知一種一種不通兩處失功遣有沒從空背空多言多慮轉不相應絕言絕慮無處不通歸根得旨隨照失宗須臾返照勝却前空

又

二由一有一亦莫守一心不生萬法無咎無咎無法不

生不心能由境滅境遂能沈境由能境能由境能欲知  
兩段元是一空叶一空同兩齊含萬象不見精麗寧有  
偏黨

又

大道體寬無易無難小見狐疑轉急轉遲執之失度必  
入邪路放之自然體無去住任性合道逍遙絕惱繫念  
乖真昏沈醜好不用勞神枉自疎親欲取一乘勿捨六  
塵

又

六塵不惡還同正覺智者無為愚人自縛法無異法妄  
生愛着將心用心豈非大錯夢幻空花何勞把捉得失  
是非一時放却眼若不睡諸夢自除心若不異萬法自  
如

又

一如體玄兀爾忘緣萬法齊觀歸復自然一切不留無  
可記憶虛明自照不勞心力一即一切一切即一但能

如何慮不畢信心不二不信心言語道斷非去來  
今

右三祖僧璨大師雖以隋大業二年示寂然賜謚入  
塔實唐玄宗開元年也信心銘以傳四祖道信道信  
大師迺為述之云

神秀禪師題廊壁偈

身是菩提樹心如明鏡臺時時勤拂拭勿使惹塵埃

六祖慧能禪師題和



菩提本無樹明鏡亦非臺本來無一物何處惹塵埃

說法偈

心地含諸種普雨悉皆生頓悟華情已菩提果自成

牛頭法融禪師答博陵王問

法性本基業夢境成差互實相微細身色心常不悟忽  
逢混沌士哀怨慙羣生託疑廣設問抱理內常明生死  
幽徑徹毀譽心不驚野老顯分答法相媿來儀蒙發羣  
生藥還如色性為

牛頭智威禪師與慧忠問答

人生莫繫念念成生死河輪迴六趣海無見出長波

師

念想由來幻性自無終始若得此中意長波當自止

忠

余本性虛無緣妄生人我如何息妄情還歸空處坐

師

虛無是實體人我何所存忘情不須息即汎般若船

忠

洪州法達禪師述

經誦三千部曹谿一句亡未明出世指寧歇累生狂羊

鹿牛權設初中後善揚誰知火宅內元是法中王

信州智常禪師參六祖祖示以偈

不見一法存無見大似浮雲遮日面不知一法守空知  
還如太空生閃電此之知見瞥然興錯認何曾解方便  
汝當一念自知非自己靈光常顯見

明州布袋和尚口占

一鉢千家飯孤身萬里遊青天覩人少問路白雲頭

潭州隱山和尚

三間茅屋從來住一道神光萬境閒莫把是非來辨我

浮生穿鑿不相關

江西道一禪師示衆

心地隨時說菩提亦祇寧事理俱無礙當生即不生

趙州從諗禪師將遊五臺學人作偈留之

無處青山不道場何須策杖禮清涼雲中縱有金毛現  
正眼傍觀非吉祥

集諗師句

石幢子被風吹折丈六金身煩惱招若與空王為弟子

金剛經  
卷一百十一  
莫教心病最難療

長沙招賢禪師偈

學道之人不識真祇為從前認識神無始劫中生死本  
痴人喚作本來人

又

百尺竿頭未得休堂堂有路少人遊禪師願達南泉去  
滿目青山萬萬秋

福州龜山正元禪師示徒偈

滄溟幾度變桑田惟有虛空獨湛然已到岷人休戀筏  
未曾度者要須船

龜山智具禪師示徒偈

心本絕塵何用洗身中無病豈求醫欲知是佛非身處  
明鏡高懸未照時

示衆偈

時值武宗  
沙汰作

勅命如雷下翠微風前垂淚脫禪衣雲中有寺不容住  
塵裏無家何處歸

又

明月分形處處新  
白衣寧墜解空人  
誰言在俗妨修道  
金粟曾為居士身

河中府公畿和尚偈語

有名非大道是非俱不禪  
意識箇中意黃葉上啼錢  
福州靈雲志勤禪師悟道偈

三十年來尋劍客  
幾回落葉又抽枝  
自從一見桃花後  
直到如今更不疑

秀州華亭德誠禪師示衆

千尺絲綸直下垂一波纔動萬波隨  
夜靜水寒魚不食滿船空載月明歸

鼎州李翱刺史嚮藥山玄化

鍊得身形似鶴形千株松下兩函經  
我來問道無餘說雲在青天水在餅

潭州石霜山慶諸禪師

頌洞山五位王子誕生



九重密處復何宣挂弊由來顯妙傳祇奉一人天地貴  
從他諸道自分權紫羅帳合君臣隔黃閣簾垂禁制全  
為汝方隅官屬戀遂將黃葉止啼錢

南嶽玄泰禪師畬山謠

畬山兒畬山兒無所知年年斫斷青山嶠就中最好衡  
嶽色杉松利斧摧貞枝靈禽野鶴無因依白雲迴避青  
煙飛猿獠路絕岩崖出芝朮失根茆草肥年年斫罷仍  
再鉏千秋終是難復初又道今年種不多來年更斫當

陽坡

張拙呈禪月大師

光明寂照徧河沙  
凡聖含靈共我家  
一念不生全體現  
六根纔動被雲遮  
斷除煩惱重增病  
趣向真如亦是邪  
隨順世緣無罣礙  
涅槃生死等空花

袁州木平山善道禪師詠

木平山裏人貌古  
言復少相看陌路  
同論心秋月皎壞  
衲線非蠶助歌聲  
有鳥城闕今日來  
一漚曾已曉

永嘉真覺大師證道歌

君不見絕學無為閒道人  
不除妄想不求真  
無明實性即佛性  
幻化空身即法身  
法身覺了無一物  
本源自性天真佛  
五蘊浮雲空去來  
三毒水泡虛出沒  
要證實相無人法  
剎那滅却阿鼻業  
若將妄語誑衆生  
自招拔舌塵沙劫  
頓覺了如來  
禪六度萬行體中圓  
夢裏明明有六趣  
覺後空空無大千  
無罪福無損益  
寂滅性中莫問覓  
比來塵鏡未曾磨  
今日分明須剖析  
誰無念誰無生

若實無生無不生喚取機關木人問求佛施功早晚成  
放四大莫把捉寂滅性中隨飲啄諸行無常一切空即  
是如來大圓覺決定說表真乘有人不肯任情徵直截  
根源佛所印摘葉尋枝我不能摩尼珠人不識如來藏  
裏親收得六般神用空不空一顆圓光色非色宗亦通  
說亦通定慧圓明不滯空非但我今獨達了河沙諸佛  
體皆同

寒山子雜詩

重巖我卜居鳥道絕人迹庭際何所有白雲抱幽石住  
茲凡幾年屢見春冬易寄語鐘鼎家虛名定何益

其二

可笑寒山道而無車馬蹤聯溪難記曲疊嶂不知重泣  
露千般草吟風一樣松此時迷徑處形問影何從

其三

欲得安身處寒山可長保微風吹幽松近聽聲愈好下  
有斑白人喃喃讀黃老十年歸不得忘却來時道

其四

山中何太冷自古非今年  
沓嶂恒凝雪幽林每吐煙  
草生芒種後葉落立秋前  
此有沈迷客窺窻不見天

其五

城中娥睂女珠珮何珊珊  
鸚鵡花前弄琵琶月下彈  
長歌三月響短舞萬人看  
未必長如此芙蓉不耐寒

其六

吾家好隱淪居處絕囂塵  
踐草成三徑瞻雲作四隣  
助

歌聲有鳥問法語無人今日娑婆樹幾年為一春

其七

琴書須自隨祿位用何為投輦從賢婦巾車有孝兒風  
吹曝麥地水溢沃魚池常念鷦鷯鳥安身在一枝

其八

鸚鵡宅西國虞羅捕得歸美人朝夕弄出入在庭幃賜  
以金籠貯局哉損羽衣不如鴻與鵠飄颻入雲飛

其九

家住綠岩下庭蕪更不芟新藤垂繚繞古石豎巉岩山  
菓獼猴摘池魚白鷺銜仙書一兩卷樹下讀喃喃

其十

茅棟野人居門前車馬踈林幽偏聚鳥溪濶本藏魚山  
菓攜兒摘臯田共婦鋤家中何所有惟有一牀書

其十一

登陟寒山道寒山路不窮谿長石磊磊澗濶草濛濛苔  
滑非關雨松鳴不假風誰能超世累共坐白雲中



其十二

獨卧重巖下蒸雲晝不消  
室中雖暗黶心裏絕喧囂  
夢去遊金闕魂歸度石橋  
拋除閑我者歷歷樹間瓢

其十三

相喚採芙蓉可憐清江裏  
遊戲不覺暮屢見狂風起  
浪捧鴛鴦兒波搖鵝鵝子  
此時居舟楫浩蕩情無已

其十四

出生三十年常遊千萬里  
行江碧草合入塞紅塵起  
鍊

藥空求仙讀書兼詠史今日歸寒山枕流以洗耳

其十五

以我栖遲處幽深難可論無風蘿自動不霧竹長昏澗  
水緣誰咽山雲忽自屯午時庵內坐始覺日頭暎

其十六

今日岩前坐坐久煙雲收一道清溪冷千尋碧嶂頭白  
雲朝影靜明月夜光浮身上無塵垢心中那更憂

其十七

花上黃鶯子間關聲可憐美人顏似玉對此弄鳴絃  
翫之能不足眷戀在韶年花飛鳥亦散灑淚春風前

其十八

歲去換愁年春來物色鮮山花笑綠水巖樹舞青煙  
蜂蝶自云樂禽魚更可憐朋遊情未已徹曉不能眠

其十九

一向寒山坐淹留三十年昨來訪親友大半入黃泉  
漸減如殘燭長流似逝川今朝對孤影不覺鬢雙懸

其二十

徒閉蓬門坐頻過歲月遷惟聞人作鬼不見鶴成仙念  
此那堪說隨緣須自憐迴瞻郊郭外古墓犁為田

其二十一

層層山水秀煙霞鎖翠微嵐拂紗巾濕露濡蓑草衣足  
躡遊方履手執古藤枝更觀塵世外夢境復何為

其二十二

誰家長不死死去亦何均始憶七尺軀俄成一聚塵黃

泉無日曉青草有時春行到傷心處松風愁殺人

其二十三

卜擇幽居地天台更莫言猿啼谿霧冷嶽色草門連竹  
葉覆松室開池引澗泉已甘休萬事採薇度殘年

其二十四

時人尋雲路雲路杳無蹤山高多嶮峻澗澗少玲瓏碧  
嶂前蕪後白雲西復東欲知雲路在雲路在虛空

其二十五

山客心悄悄常嗟歲序遷辛勤采芝朮搜斥詎成仙庭  
廓雲初卷林明月正圓不歸何所為桂樹相留連

其二十六

有一餐霞子其居諱俗遊論時實蕭爽在夏亦如秋幽  
澗常瀝瀝高松風颼颼其中半日坐忘却百年愁

其二十七

我見世間人茫茫走路塵不知此中事將何為去津滌  
華能幾日眷屬片時親縱有千斤金不如林下貧

其二十八

去年春鳥鳴此時思弟兄今年秋菊爛此時思發生綠  
水千場咽黃雲四面平哀哉百年內腸斷憶咸京

其二十九

我聞天台山山中有琪樹永言欲攀上莫繞石橋路緣  
此生悲歎幸居將已暮今日觀鏡中颯颯鬢垂素

其三十

寒山栖隱處絕得世人過時逢林內鳥相共唱山歌瑞

草聯谿谷老松枕嵯峨可觀無事客憩歇在岩阿

其三十一

寒巖深更好無人行此道白雲高岫閒青嶂孤猿嘯我  
更何所親暢志自宜老形容寒暑遷心珠甚可保

其三十二

欲向東巖去于今無量年昨來扳葛上半路困風煙徑  
窄衣難進苔粘履不前往茲丹桂下且枕白雲眠

其三十三



白雲高嵯峨綠水蕩潭波此處聞漁父時時鼓棹歌聲  
聲不可聽令我愁思多誰謂雀無角其如穿屋何

其三十四

千雲萬水間中有一閒士白日遊青山夜歸岩下睡  
倏爾過春秋寂然無塵累快哉何所依靜若秋江水

其三十五

高高峰頂上四顧極無邊獨坐無人知孤月照寒泉  
泉中且無月月自在青天吟此一曲歌歌中不是禪

其三十六

自羨山間樂逍遙無倚托  
逐日養殘軀閒思無所作  
時披古佛書往往登石閣  
下窺千尺崖上有雲盤礴  
寒月冷颼颼身似孤飛鶴

其三十七

棲遲寒岩下偏訝最幽竒  
攜籃採山茹挈籠摘菓歸  
蔬齋敷茅坐啜啄食紫芝  
清沼濯瓢鉢雜和煮稠稀  
當陽擁裘坐閒讀古人詩

七言雜詩

一住寒山萬事休更無雜念掛心頭閒于石壁題詩句  
任運還同不繫舟

其二

余家本住在天台雲路煙深絕客來千仞巖巒深可遜  
萬重谿澗石樓臺

拾得詩

君見月光明照燭四天下圓輝掛太虛瑩淨能瀟灑人

道有虧盈我見無衰謝狀似摩尼珠光明無晝夜

又

迢迢山徑險萬仞復多危石橋莓苔綠時見片雲飛瀑  
布懸如練月影落潭輝更登華頂上猶待孤鶴期

雪峰義存祖師偈

天色清明綠嶂分色身趨背底辛勤法門一悟無生指  
萬里虛空絕點雲

自述

思量未到雪峰時愛把浮生取次疑及至法門非法法  
到頭無我亦無師

永明延壽禪師上堂


孤猿叫落中巖月野客吟殘半夜燈此境此時誰得意  
白雲深處坐禪僧

歸宗芝禪師結菴絕頂

千峰頂上一間屋老僧半間雲半間昨夜雲隨風雨去  
到頭不似老僧閒

法昌遇禪師上堂語

春山青春水綠一覺南柯夢初足攜筇縱步出松門是  
處桃英香馥郁因思昔日靈雲老三十年來無處討如  
今競愛摘楊花紅香滿地無人掃



石倉歷代詩選卷一百十一